

Aatsitassanut inatsisip allanngortinneqarnissaanut siunnersuummik UKA2022-mi saqqummiussinissamik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut, taamaalilluni inatsimmi § 1, imm. 2 ima oqaasertalerneqassalluni: "Ingerlatanik inatsimmut ilaasunik suliarinninnermi isumannaallisaaneq, peqqissuseq, avatangiisit, pisuussutiniq atorluaaneq kiisalu inuiaqatigiinnut akornutaanngitsumik ingerlatat suliarineqarnissaat kiisalu pissutsini assigiinngitsuni nunat tamat pitsaanerpaamik ileqqorissaartarnerat akuerisaasut qulakkeerneqarnissaat Inatsisartut inatsisaatigut anguniarneqarpoq". § 83-mi oqaasertaliussaq "nunat tamat ileqqorisartagaat pitsaasut" aamma "nunat tamat pitsaanerpaamik ileqqorisartagaat, Kalaallit Nunaanni pissutsinut naleqqussagaq"-mut aamma allanngortinneqassaaq. Taamattaq misissueqqaarnissanut qinnuteqaatinik paasissutissanik Naalakkersuisut tamanut saqqummiussisalernissaannik inatsimmi aalajangersagaliisoqassaaq, taamaaliornikkut piffinni innuttaasut soqutigisaqartullu allat, sapinngisamik siusinnerpaamik taamatut suliaqartoqarnissaanik ilisimasaqalersinnaaqullugit.

(Inatsisartunut ilaasortaq Mariane Paviasen, Inuit Ataqtigiit)

Akissuteqaat

(Ineqarnermut, Attaveqaasersuutitut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Aappassaanneerreqarnera

Naalakkersuisut sinnerlugit Inuussutissarsiornermut Aatsitassanullu Ataatsimiititaliaq aalajangiiffigisassatut siunnersuut saqqummiunneqartoq sukumiisumik suliarimmagu qutsavigaara.

Siunnersuutip siullermeerneqarnerani siunnersuut manna Naalakkersuisut saqqummiuppaat:

Inatsisartunit aalajangigassatut siunnersuut, Naalakkersuisut peqquneqassasut inatsisiliassami qulakkeerneqassasoq isumannaallisaanermi avatangiisinullu tunngasuni piumasaqaateqassasoq qaffasinnerpaanik innuttaasunillu akuutitsinerulertoqassasoq ammanerulertoqarlunilu.

Inuussutissarsiornermut Aatsitassanullu Ataatsimiititaliaq isumaliutissiissummini allannguutissatut siunnersuutiniq marlunnik allanik saqqummiussivoq.

Amerlanerussuteqartut Siumumeersut aamma Atassummeersut allannguutissatut siunnersuutip matuma akuerineqarnissaa inassutigaat.

Siunnersuutigineqartutut inatsimmik sukaterinerup pitsaaqutaasa ajoqutaasalu nassuiaatigineqarnissaannut Naalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaat Inatsisartunut kingusinnerpaamik UKA2022-mi saqqummiunneqassaaq, tamatumalu kingorna inatsimmik allannguinnissaq piviusunngortinneqassanersoq aalajangiiffigineqassaaq.

Ikinnerussuteqartut Inuit Ataqtigiinneersut allannguutissatut siunnersuutip matuma akuerineqarnissaa inassutigaat.

Inatsisissap ilusilerneqarnerani piomasagaatit qaffasissuunissaasa isumannaallisaanermut avatangiisinullu aammalu innuttaasunik akuutitsinerup ammasuunissallu annertusitinneqarnissaasa qulakkeerneqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut. Inatsit UKA2022-mi Inatsisartunit suliarineqartussanngorlugu saqqummiunneqassaaq.

Ataatsimiititaliap oqaatigisaatut iluaqutissartaasunut ajoqutissartaasunullu nassuiaat inatsisunik nutaanik suliarinninnerup pissusissamisoortumik ilagaa. Taamaattumik amerlanerussuteqartut allannguutissatut siunnersuut saqqummiussaata naleqquttoq Naalakkersuisut isumaqanngillat.

Ikinnerussuteqartut allannguutissatut siunnersuummik saqqummiussinerannut tunngatillugu, piffissap erseqqinnerusumik killilerneqartup iluani inatsisissatut siunnersuutunik saqqummiussinissamik Naalakkersuisut pisussaaffilerusunneqartut, Naalakkersuisut paasisinnaavaat.

Taamaattumik ikinnerussuteqartut allannguutissatut siunnersuutaat akuerineqassasoq Naalakkersuisut inassutigaat.